

四庫全書

集部

欽定四庫全書

石倉歷代詩選卷四百六十六

明 曹學佺 編

明詩次集一百

鄭岳

立春和林見素韻

人生百歲期荏苒十踰四春陽布德新花鳥各自媚  
鬢髮日以種歡悰與昔異寢食淡無營綢繆護元氣朝雨

洗春痕南山已堆翠幽勝愜素期糾紛傷往事所貴一  
身存儻來物皆寄破屋城南隈百需無一備雲莊結比  
隣時枉佳章遺諷詠激微衷懷哉邈高致

秋齋為周彥通侍御韻

午夢忽夢覺呼童開竹扉借問客為誰青驄束金羈手  
持卷一握錯落瓊琚詞展玩重太息遐心將在茲二氣  
互翕張真宰執玄機物盛不可過斂舒各以時露凝天  
宇淨樹變郊原稀芝蘭抱孤芳鷹隼奮高飛齋居感深

念流光倏如馳及時當自勵毋令華髮滋

送何子元少宰改任南都

夏秋多靈雨沈陰翳晨光積潦斷衢塗欲濟苦無梁送  
子出城闐策馬登前岡回飈激流雲顛氣變清商憑高  
一舒睇天宇何茫茫感茲物候異鬱鬱情內傷古稱楚  
多才弱冠已擅場博學富文藻節操誠慨慷茲行豈徒  
然抗言繫綱常南望鍾山遥白雲懷帝鄉風露日夕清  
蘭桂發幽芳與子結綢繆望望不得將平生契分深白

首相激昂浮榮久難恃萬世一何長願言保終節青簡  
諒毋忘

幽居公署書懷

寧無人宸濠久蓄異志予由臬轉藩裁抑逆萌  
濠不能堪嗾同寮橫加誣訐威賂工下文致其事  
逮繫踰年始得罷歸憂患中嘗作蒙難錄茲摘  
其槩書之

咄咄日書空禍階嘅伊始蟻穴昔何微潰川浩無涘數

至諒難違修身以順俟明夷古所悲演易在姜里厲貞乃  
終吉齋心悟玄理

其二

谿壑絕險巖千仞猶可窮人心如其面談笑伏兵戎田  
灌平生交杯酒不相容魏其力解紛乃迸遭禍凶往事  
昧明訓邈哉廉蔺蹤鷗蚌久相持漁人並收功

其三

平生相傾慕會合意何敦相期振頽靡撫心憫元元如

何自猜忌枝葉傷同根川洛構黨禍善類鮮安存王導  
仇伯仁千載抱煩冤古來同歎息棄置復何言

其四

鴉鳥栖前楹啞啞動哀鳴須臾雙鵲呼下上如有營既  
憂還復喜徒亂羈旅情毀譽隨愛憎吉凶竟難憑瞞瞞  
絕聰聽冥心遊太清

遊俠篇

戰國貴公子孟嘗最稱賢食祿儼萬乘養士滿三千雞

鳴與狗盜生死同周旋信誓重然諾服御鬪芳妍一言  
偶合意不惜千金捐後宮出綺麗歌舞出華筵晝夜務  
經營力折王公權殺人報睚眦道路不敢言頽風一以  
開延蔓彌八埏漢網方疎闊吞舟漏重淵吳淞招死士  
密置淆澠間豈知真將軍輕車出藍田逆節竟鑽斧明  
鑒垂簡編

林竹田司空自予蒙難屢為救解茲過洪都挈  
予妻子同歸感而有作



司空並鄉國弱冠挹光儀意義重相許肝膽不復疑名  
位日以崇詎肯忘賤微臨難力相拯千里歸厚遺縈紆  
枉川陸為我解纍羈舉家脫虎口相將返柴扉深衷懷  
感激不覺涕交頤時情轉盼異古道誰復持祈奚免叔  
向豈為平生私高情激千古流俗安足希

九江阻風泊舟有感

白浪起層層峰頭雲正黑迴舟入小港聊茲一憩息路  
梗難為期滄波浩無極坐觀北來船帆挂千里直篙工

意閒暇津津動顏色緬懷造化心施予難為力往船風  
宜南來船風宜北南北本異途彼此那俱得物理每循  
環明朝未可測隱几澹無營冥心悟義易

過水口

建溪昔稱險橫流多怪石參差列牛馬廉利侔劍戟篙  
工慣習水禱賽資神力前後互招呼分寸恐或失激盪  
轟雷鳴沫流飛雪白諦觀毛髮豎一命試輕擲逶迤過  
水口灘盡溪流碧棹歌發清響貫酒娛西夕患至慮煩

紆險過事愉懌物理固其然臨流長太息

發陝城

長安古都會弭節暫盤桓羣公日惠顧樽俎接清歡如  
何別去此遙遙赴臯蘭維時秋已分日夕風露寒清霜  
肅原野草樹漸摧殘玄蟬噤其聲蟋蟀鳴夜闌客子感  
時序悽然懷永歎迴望雙闕遙迢遞層漢間清光勞夢  
寐行役何時還

馬嵬之南數百武為逆璫劉瑾故宅噫楊妃以

此地沒而瑾復以此地生豈事有適然歟均  
足示戒

明皇西幸日鬼坡駐鑾旂六軍不肯發宛轉縊蛾眉悠  
悠百世下撫跡空嗟咨妖氛豈未散闇豎復生茲懷奸  
竊大柄國勢欲潛移事頗天寶類幸爾亟誅夷羣奸起  
嗣虐四海成瘡痍亂階鑒婦寺永垂萬世規

內丘憫旱

內丘數十里磽确環高原十旬不得雨四野沙塵昏黍

粟焦且死艱食憫元元官柳摧為薪煮葉充晨餐老穉  
出赴食破屋棄荒村公庾素乏儲富室徒勸分鮒魚得  
斗水猶幸性命存安得沛甘澤萬物回枯根

蘭州以山名北枕黃河城之西有唐帽山尤秀  
特彭司馬幸庵先塋在焉

南望臯蘭山北枕大河流山勢相蜿蜒河流去不休華  
夷界南北關陝扼襟喉中有唐帽山高壠鬱松楸靈氣  
鍾之人元老克壯猶邊事久經畧樽俎運深籌

秋日偕社友遊溪聲閣

凌晨出南郭悠悠衢路長  
褰帷臨迴野迴飈遞微涼  
蒸鬱漸以舒顥氣應清商  
農家收稿秸禾稼已登場  
幸茲歲頗熟閭閻得小康  
凝烟翳林莽鸛雀相翱翔  
古來賢達士墟墓列道傍  
感茲起遐思人生安可常  
涓辰集儔侶迤邐越林岡  
梵宇隱寥廓溪聲瀉琳琅  
山廚登野蔌石鼎炷篆香  
談諧淹竟日薄晚雨冥濛  
老至惜頽景駒隙度流光  
及時恣遊賞毋徒傷慨慷

和林汝儀招飲溪閣韻

旭日散林霏，澄波銜山影。  
離城纔幾許，已覺非人境。  
侵階雨氣潤，攪樹風力猛。  
采采園中蔬，盈盈水中荇。  
更覓前溪魚，垂竿移舴艋。  
占年慰夙期，刺水秧千頃。  
几杖松壇幽，雞犬柴門靜。  
幸逢素心人，高談白日永。

黃仲陽東洲別業

北郭亘芳阡，延矚鬱幽邃。  
木蘭及使華，二水於茲會。  
墟曲靄人煙，平疇間溝澮。  
澄潭集漁網，沃土供王稅。  
結構

際交流儼與羣峰對閒庭芳草積隙牖蛛絲綴慮澹物  
俱忘知寡我獨貴茲勝君先得吾駕將焉稅硤确多棄  
壤所求亦易遂衡茅成小築徐徐理荒穢來往話桑麻  
聊茲閱年歲

淇縣有殷三仁祠將至衛輝有殷太師比干墓  
廟

秋黍何離離驅馬登殷墟孟門與太行左右相縈紆狡  
童不我好萬乘為獨夫圖任惟奸回親賢反見踈矢心



各自靖揆道豈云殊埋骨邈千年廟貌猶古初孔聖贊  
一詞永與天壤俱

安肅南出有劉伶墓碑

鹿車一壺酒荷插以自隨云死即我埋曠達不可羈如  
何此墟曲有塚高纍纍刻石紀道旁無乃好事為沈酣  
弃禮法車服焉得維遭危固有託舉世人莫窺苦節多  
湮沒怪爾名獨垂

畫馬行

房星耿耿明碧落神駒墮地走沙漠天閑秣飼列奚官  
逸氣俛就青絲絡古來神駿豈易畜遺貌至今動人目  
碑兀爭看骨格奇人間萬馬徒多肉汗血染成五色紋  
碧蹄高踏秋空雲蹀躞嘶鳴神彩溢此圖疑出曹將軍  
渥洼異產今寂寞世無伯樂何由識但收遺骨破千金  
不用按圖遠相索

玉泉院對華峰有懷見素大司寇

華峰三面開芙蓉天然秀色浮空中我來坐玩日當午

膚雲忽合雨濛濛南峰隱霧不可見東西峙立鬱葱菁  
懸崖瀑溜垂千條流出亂石如素練結亭據石出林端  
極目煙雲渺秦甸雲莊素老性好竒惜未到此一觀之  
蒼厓千仞意俱往飄飄拄杖凌空飛象外烟霞諧笑語  
風前咳唾成珠璣生平風格狎林藪垂老跼蹐留京師  
宿望由來繫朝野屢疏還山未有期使還相見一撫掌  
請翁和我華山詩

東湖書院為吳亞卿獻臣題

大雲山中泉一注東湖先生讀書處先生胸次迴出塵  
山中草木皆真趣讀書豈徒事鉛槧匡時事業于茲具  
試出緒餘售于人要使蒼生盡陶鑄平生苦節甘若飴  
妻子不免於寒飢遇事直前無顧忌終遭坎壈蹈危機  
達生委命寧自悔萬里生還天所遺山中茅屋依然在  
洞雲江月副心期

會盟臺

羸秦日肆虎狼威約趙西來會澠池相如登壇奮怒髮

呵叱秦王如豎兒長平禍胎從此結區區擊缶亦徒為  
會盟有臺今寂寞夕陽蔓草封殘碑

奉侯林見素都憲平蜀寇致仕

洪都通驛使廬岳候仙舟一水遙相望羣山獨對愁交  
情憐白首歸興憶滄洲身退功成日川江正急流

二

國步艱難日天書趣赴時金牛新戰壘白帝舊城池羽  
檄申嚴令饒歌雜雅詞乖崖留像處聊慰蜀人思

三

幕府功頻上騷壇興每登江搖青嶂影樹入碧雲層陣  
法依諸葛詩篇出少陵蒼厓看墨蹟長憶漢中丞

過同年胡伯鍾家留題

別離經十載今雨到君家村徑斜穿竹江流曲擁沙魚  
肥翻細網莧美摘新芽契闊談無盡宵殘更煮茶

題陳山人所居

山居成小聚野戍雜耕屯雞犬時登屋軒車少過門高

春含暮景芳樹漏春痕風物居然別桃源何處存

江村即事

府江江水惡一歲九經過近午霧方散中流石更多漁  
樵荒舊路豺虎據深窩最念沿江戍天寒獨枕戈

月峰寺次見素韻送陳惟濬正郎時謫戍過此  
溪聲寒滴滴峰影晝沈沈落日孤臣淚疎砧故國心江  
村竹葉酒野寺木棉衾邂逅緣非偶山川幸一臨

送洪商臣出鎮水寨

多少年英畧提兵羨此行  
枕樓明海色鼙鼓震邊聲  
浪沒鯨鯢窟雲閑鳥隼旌  
梅峰清夜月應照水西營

野望

病告捐微祿官閒帶舊銜  
提攜惟藥裹懶漫廢書緘  
海濶浮孤嶼天空挂一帆  
吟眸隨處著秋色滿衣衫

雨不絕

薄晚看晴色中宵復雨聲  
疎鐘京國夢孤燭異鄉情  
岐邑勞供應關山斷送迎  
行藏信天道不必問陰晴



過沛縣

破屋浮波面輕帆繫樹腰  
歌風何慷慨擊筑竟蕭條  
故里英雄戀荒臺霸氣銷  
向來湯沐地無處問漁樵

野宿

浹旬長苦雨今夕月生光  
影動晴峰雪寒凝碧瓦霜  
盤飧羅野藪雞犬靜村莊  
重引還山興題詩寄草堂

春日泛舟木蘭

南郭曉初霽維舟曲岸旁  
踏青林莽淨修楔水雲長  
汀

霧晴猶濕潭花落更香木蘭知不遠漁唱隔滄浪

秋夜感懷

悄悄空庭暮啼鳥集子城疎燈懸夜雨落葉散秋聲遁  
跡元無累憂時獨繫情何當逢北使款語及昇平

春日梅隴書事

步履仍扶杖拋書獨凭欄凝烟迷野望積雨釀春寒麥  
隴抽新綠花枝綴渥丹韶華不覺換猶作去年看

九鯉湖

擁被宿雲館神清夢亦安水聲喧夜雨山氣挾春寒簷  
箔明星度溪鄉白露團神仙隱名姓厓上浪尋看

贈方文玉左轄南還

榜下人還幾天涯意倍親因君謝塵鞅復此歎參辰戎  
務時叅畫軍興屢算緡江湖平劇寇越舊拊罷民祿秩  
承三錫封章見屢陳客途方雨雪故國尚松筠潮汐門  
通海清輝月近隣山僧遺紫笋漁父薦纖鱗觸事情俱  
適無為俗轉淳穀齋諸老在結社繼前人

過嚴陵釣臺

漢室中興日賢人願仕時先生獨不屈此意竟誰窺文  
叔差增舊君房亦素癡謀謨先已定仁義此安施即欲  
助為理尤宜自得師詔書勤遠訪諫議處仍卑志士寧  
相逼高賢不受羈羊裘終隱去魚釣可忘飢炎祚噓重  
燄桐江繫一絲雲臺俱泯沒嚴瀨自清漪遺廟松株古  
蒼崖壁立危扁舟歸老客悵望讀殘碑

贈崔都閫移鎮廣東

驛騎傳新報除書出上方嶺南移節近薊北望京長  
氣浮城櫓霜花拂劍鋌閫嚴施畫戟權重握銀章寇壘  
逃官責軍功冒戰場豈能窮窟穴徒爾費芻糧買犢終  
銷盜留田足破羌從來邊徼地籌畧在兵防

送邵主事督餉還南部

曉風吹浪滯行舟天與龍沙一日留千里轉輸勞使節  
三山繚繞望神州江搖滕閣烟光晚霜落吳門草樹秋  
射矢投壺誰妙手任拚同醉解離憂

贈同年徐必東調官貴州經憲

黃鶴樓前繫短橈，離魂湘水不須招。  
雲連魏闕瞻猶近，路比匡州去未遙。  
一鴈叫霜天欲暝，亂山隨馬凍初消。  
河橋欲贈無楊柳，獨有松枝最後凋。

寄贈彭元岳僉憲致仕

覆鹿悠悠夢已醒，移文深謝草堂靈。  
蓮峰徑遠來求仲，木榻年深坐管寧。  
竹杖謾扶頭未白，家山慣見眼猶青。  
茅齋靜閉橫塘上，還把餘閒注鶴經。

宿高良山和趙栗夫提學韻

一徑紆迴萬竹深  
招提隱隱獨追尋  
溪山是處供青眼  
猿鶴他年識素心  
巖陡樹枝常倒下  
簷虛峰勢只平臨  
客途荏苒春將暮  
坐對鶯花憶故林

寓建寧玉清觀次楊恒叔太僕韻

窓懸石溜徑浮沙  
洞裏神仙別有家  
玄圃開雲深種玉  
丹厓向日更移花  
天垂碧野千峰遶  
路隔紅塵一水賒  
昨夜殷雷送山雨  
半溪新漲浸紅霞

訪玉清觀道士祈雨不遇

方舟亭午泊溪沙杖策重尋羽士家  
池涸已荒書帶草庭幽還見木犀花  
松壇乞雨歸應晚竹屋留詩興獨賒  
虛閣疎欄宜晚眺溪光十里映晴霞

送馬善徵致仕還吳

君去洞庭何處住海門迢遞接東甌  
湖田歲熟收粳稻烟渚秋高弄釣舟  
謾說孔明無將略早知若水是仙流  
浮生萬事何時盡都把閒情付白鷗



一素亭和見素韻

千卷儲書作墨莊，夢隨春草到池塘。  
涓涓碧井分仙社，面面青峰隔女牆。  
丹桂燕山多異種，金砂樵谷有遺方。  
接羅倒著閒臨水，照見鬢髮影長。

詠淖泉

淖口飛泉玉雪清，決渠疏引入秦城。  
民居萬戶沾餘瀝，客邸三秋解宿酲。  
雲物映來多異態，年光流去不停聲。  
臨池且盡杯中醪，浪跡乾坤一聚萍。

送陶司馬南京叅贊

纔解計臺朝北闕復司留鑰赴南都成周召伯嘗分陝  
晉代陶公亦鎮吳萬里長江天共險六朝遺跡草空蕪  
廟謨方爾資黃髮莫羨扁舟范蠡圖

過聖壽寺午憩

沖沁溪頭泊釣舟並騎羸馬訪山遊松簷長宿三春雨  
麥隴初登四月秋地僻安禪僧欲定時平擊壤我能謳  
悠悠萬事渾無盡瓜熟青門有故侯

隴州阻雨

幽窓局雨一燈明  
獨宿空堂此夜情  
隴道寒深雙鬢短  
關山路險寸心驚  
天連絕塞風烟色  
秋入荒城鼓角聲  
却憶馬周投逆旅  
開樽寂寞對誰傾

過岐山

西行終日雨冥濛  
隱約岐山入望中  
周室餘民猶穴處  
雍郊舊俗重農功  
遠離狄道思今日  
肇造王基自古公  
鳳去梧桐枯何足  
問離離禾黍起秋風

過汧陽

濕霧經旬淹白日晴峰今日倚丹霄  
頽坡荷鍤開榛徑缺岍橫槎接野橋  
玉節北來鴻信斷金城西去馬蹄遙  
汧陽縣郭居人少風露高秋夜寂寥

奉贈蔣師相敬所致仕歸湘源兼柬令兄大司徒一首

力辭機柄遂歸田朝野相看意惘然  
直節舊嘗稱宋璟抗言終不負伊川  
三孤望重台階正八座官高棣萼聯

相業都歸嘉靖詔他年信史有遺編

送朱必東侍御還莆

仍著初衣返故林許身真不愧南金片言悟主情尤切  
萬死寬恩幸亦深更向一貧看壯節那容暫蹶負遐心  
白頭鄉國慚無補却藉多賢振好音

贈王時行赴任東廣兼柬吳獻臣方伯

晴莎細草馬頻嘶極浦荒烟眼欲迷野曠推篷山色遶  
天寒度嶺野猿啼五羊分署行新詔九鯉尋真記舊題

為憶東湖諸舊侶一區雲水足幽棲

經武夷阻雨不及遊悵然有懷追和舊作

武夷九曲慣曾遊暮雨危灘阻去舟  
雙眼迢迢雲外望羣峰宛轉意中留  
棲遲講道人應古汗漫尋真事却幽  
不用登臨恣清賞胸中元自有林丘

憩常思嶺用壁間韻

常思嶺上駐征軺三日歸程覺尚遙  
衰疾久懸鄉土夢迂疎無補聖明朝  
石巖雨過雲猶濕海國秋深草未凋

願得四封無一事不妨高枕卧山椒

簡姑蘇陳粹之憲副

吳苑鶯花滿舊墟先生翻笑出無車  
一官棄去還憂國十口飢來只賣書  
短屐香生莎徑暖疎欄雲傍草堂虛  
勿勿登拜慚予晚更報詩筒候起居

送劉克柔之任南鴻臚

鍾山蔥鬱鎖晴嵐拄笏登臨路舊諳  
纔見陸機來洛下豈容太史滯周南  
畫船風送牙檣疾碧碗冰浮紫藕甘

典客空庭無一事詩中三昧許誰叅

寓蘇州送張文相宰潮陽

十年朋舊歎辰星邂逅他鄉眼倍明  
風雪吳門三日話江湖魏闕百年情  
亂山雨色連鄉郡列宿晴光動海城  
到日潮陽春正好綠陰羸馬課農耕

司徒劉近山邀造別墅之土樓蓬蒿塞徑時有  
高二尺五之嘲因贈以詩

誅茅南郭託幽棲簇簇烟村路轉迷  
故隴松楸山下上



豐年禾黍屋東西高官歸第貧如洗速客看山醉似泥  
韋曲去天元尺五旁人休笑此樓低

蘭州聞見素致仕用韻奉寄二首

手疏連封乞引年夢魂先遶八壺巔雲莊歲晚還移竹  
蘭水風清欲放船遠別無緣臨潞渚獨遊何意向秦川  
老臣去國丹衷在指點星河幾廢眠

綠野依然一草亭焚香讀易意醒醒九重殊遇憐衰白  
八座高名照汗青道在行藏敦士習身猶矍鑠訝仙靈

煙霞舊侶他年約拄杖臨滄再勒銘

德州遇王時行大叅夜話

十日行舟離帝里茲宵秉燭對鄉人  
足音何啻聞空谷星彩還應照近隣  
賈傅早能輕利達范公元亦起孤貧  
迂疎老我歸林壑佇望來賢意最真

夏日林以吉中丞過訪梅莊

靜對青山日轉遲多君枉駕話襟期  
午炊送米城中至露坐傳杯月下移  
數畝退耕閒曠地十年歸卧太平時

人生止足真堪樂  
蝸角輸贏總不知

和李貳守題梅隴山莊韻兼以道別

旭日郊原散暖煙  
津津物色入新年  
溪環崎曲數家住  
春到梅梢十日先  
洛社潞公還地主  
草堂嚴武有詩傳  
驪駒無那攀轅別  
北望心懸萬里天

九江分司題岳武穆故宅

石甃方池幾百年  
岳王遺宅世猶傳  
格天高閣今安在  
葛嶺荆榛野雉眠

蘭

短葉疎莖雜野蒿不隨清廟薦溪毛  
白頭空谷幽人老  
夜雨篝燈讀楚騷

菊

斗絕孤厓倚碧空秋深烟雨寄芳叢  
林垞寂寞誰相問  
千里心期栗里翁

夏日山中雜咏二首

隴上新開百荔莊交枝接葉覆茅堂  
青林結實殊稀少

應笑山人歲計荒

荒郊無雨再經旬  
豆葉禾苗赤色新  
宴坐樹陰猶覺暑  
田中更有踏車人

汝寧道中遇雪呈蔣升之太守

畿甸一冬愁少雪  
飛沙滿地麥苗稀  
黃河南渡春猶淺  
始見郊原白雪飛

過洛陽故城

伊闕山高伊水清  
洛陽形勝舊曾名  
累朝遺跡今俱盡

斷塹荒郊只廢城

過貴溪風雨暴至

溽暑蒸人一洗空  
碧天遙影見歸鴻  
圖書小艇無官況  
落日溪頭狎釣翁

草萍驛

蕭疎驛舍繞烟蘿  
二十年前此地過  
詩壁舊題無處覓  
植松庭外已婆娑

度分水關

計偕當日此攀躋曾有狂詞嶺上題  
治策山河成漫語  
千峰秋色夕陽西

登舟

常山輿馬玉山舟客路驅人不自由  
却羨江邊幾家屋

柴門斜對白鷗洲

附鄭汝美

字希大閩縣人與鄭山齋同癸丑科進士

遊石鼓山次韻林見素都憲

石鼓啓宿霧高峰亂攢青  
長江走其下五虎障東溟  
金

濤萬頃翻扶桑日初出鼇極巋然存古今亦倏忽全閩  
稱一絕斯言良不虛華夷大界限此鎮為之樞如幄老  
豫樟培植有年歲何限明堂材岩阿與山背無諸事如  
何吾欲問劣削霸業釣臺荒桑田海濤白

過建昌嘲舒太守

夙慕麻姑山不在麻姑酒東道有賢侯況是舊僚友登  
臨興浩然未果誰掣肘分司御史來駐節日已久坐此  
廢清游伊誰執其咎桃花空有源雙練亦徒濶俯仰天



地間良會豈常偶莫遣愁上眉難逢笑中口縱惠酒千  
鍾何如詩百首解纜重開頭推蓬頻執手

寓宣府公署

征旆臨沙漠何如傍帝居重裘三伏備輕騎幾時無夜  
析隨風急秋砧與月俱安邊須上策肉食可能圖

悵望

山色秋來瘦溪流雨後狂何人賦搖落有客詠滄浪幽  
谷千年雪邊城六月霜奔馳淹歲月回首憶吾鄉

中秋寓西湖山莊雜詠

今夜中秋好孤吟  
文會堂湖光和月靜  
風氣帶荷涼  
寺近鼓鐘響  
林深鳥雀藏  
貪遊過子夜  
玉露濕衣裳

晚泊沙港時風雨大作

棹繫三餘港  
雷驅萬里風  
石虹迷隱見  
玉馬失西東  
雨腳穿窻急  
溪流拍岸洪  
眼前無限景  
次第送詩翁

過采石

李白騎鯨處  
扁舟幾往還  
無詩酬采石  
有淚對青山  
玉

殿恩初斷金雞詔未頒詞林猶仰止樓閣俯江關

晚發城西

西城斜日去舟下水南涯潭面開銅鏡灘頭滾浪花雲  
藏棲鳥樹月照浴鷗沙試問太平驛前村路更賒

宿慈源寺

駐節慈源寺春光付水湄野花爭點點富竹自漪漪性  
靜青山好心閒白日遲鯨音驚鶴夢飛動萬年枝

感懷題黃鶴樓別意圖

今古崔公句乾坤黃鶴樓晴川開醉眼芳草長離愁客  
散雲埋樹詩成月在舟白湖歸計遠莫說別來由

暮泊金口驛

金口維官棹風微五兩輕歸鴉投樹急返照入窻明江  
上漁歌起磯邊驛使迎回峰山下寺卧聽晚鐘聲

夜泊魚山驛

蘆洲浮霧翠麥壠拂雲黃楚棹三江遠川流萬里長龍  
潭晴亦雨魚澤夏還涼風度采蓮曲誰家遊冶郎

登岳陽樓阻雨

駐節巴陵道風狂雨似麻  
楚天紅日隱衡岳碧雲遮  
巨浸迷青草長空舞白沙  
茫茫天一色吾欲泛靈槎

冬日漫成

寒夜不圍爐霜威幾裂膚  
銜杯猶未暖擊柝豈能呼  
千里關河凍三邊戍卒孤  
老天有何意不早放金烏

與方岳諸公登萬壽寺塔

萬歲千年塔羣公此日登  
宿雲開遠岫斜日照諸陵  
白

鳥巡簷慣清風送客曾海門如咫尺彷彿見蛟騰

送蔡僉憲入賀

畫戟森征旆琅函捧表章西關離席促北闕去途長丹  
荔迎風落紅蕖帶露涼溪肥連日雨樹瘦隔年霜吏散  
空庭靜夫催伐鼓忙郵供行路廩纜拽上灘航寶劍懷  
三尺瑤琴撫一張皇明歌有道聖壽祝無疆

題西湖景

西湖勝景出塵寰此日披圖一破顏勒馬呼童沽綠酒

移舟隨意看青山蘇公堤在人爭仰逋叟梅開鶴自還  
試問南朝多少寺莓苔煙雨總奇觀

次林見素得告志喜韻

壺公作怪漫須論一劍曾聞請帝閣解組疏能回殿陛  
化衣塵不到山村花間蝴蝶頻來枕江上鷗鷺久候門  
忙在青山間在史可能忘却野人暄

乙丑冬奉詔進階友人林利光有詩賀因次韻

答之

半竿分釣白湖濱  
眼底誰憐疎遠臣  
自是聖朝無棄物  
却令寒谷有餘春  
菊開處處堪招隱  
梅發年年不問新  
廊廟江湖憂樂共  
希文訓在久書紳

冬至述懷

魯臺雲物望今辰  
誰識乾坤第一春  
萬卉跡潛生意後  
六葭灰動化機新  
楚狂未許歌衰鳳  
孔聖何須泣獲麟  
道長正為君子喜  
梅花索笑短簷巡

題寺中蘿蔔船



不見山翁斧鑿痕青絲為纜繫空門輕帆背日抽新葉  
短楫搖風長舊根欲度浮生歸佛海懶隨漁父泛仙源  
江湖滿地乾坤窄留與詩僧載四恩

夏夜宿葉源頭極高明樓因憶謝家諸昆玉

炎天夜宿故人樓八面湘簾總上鉤月照梅花光似晝  
風生薤葉冷于秋幾番好雨償深願千里停雲憶舊遊  
要識高明何處極高山流水寂無愁

題寄亭次西涯先生韻

蕩蕩乾坤托此身百年風月肯留人  
雲山鳥外常為主  
花月亭前不記春碑坐石龜文字古  
松巢野鶴往來頻  
官家歲月真如寄清興還輸草莽臣

過江州

征帆此日過江州蘆荻花開滿眼秋  
行部無心重駐節  
同官有約共登樓人情土俗驚新換  
月色江聲憶舊遊  
一笑相逢還有幾且須沽酒作詩鉤

紫雲河下會楊憲副口占誌別

客邊懷抱殊岑寂樽酒逢君喜若何  
世事憑誰披宿霧  
宦情于我等秋波丹楓霜早初堆地  
白鴈天寒已渡河  
他日翻思相會處紫雲溪上暮雲多

暮泊金沙

宿舟薄暮宿金沙詩景無邊興不賒  
瓦屋木標官長鋪  
篷窻草戶野人家溪頭邀月新栽竹  
隴背開雲舊種瓜  
試問居民何所事漁樵耕鑿足生涯

過分水關

使旆飄飄道路長  
山行忽遇小春陽  
立冬前日還秋令  
分水關頭即故鄉  
鳳闕峻增紅日裏  
龍峰彷彿白雲傍  
男兒大節憑誰是  
一樣君親兩著忙

和黃鐵橋遊鼓山韻

萬大巍于五丈原懸崖怪石絡松根  
尋真雲踏屐千頃  
寫景詩鈎酒一樽  
人憩半山亭有扁茶供上國寺無園  
鐵橋未盡登臨興  
回首斜陽射石門

登城懷古

官柳猶遮舊女牆  
角聲孤起送斜陽  
英雄百戰成寥落  
吳楚中分半渺茫  
寒鴈叫羣悲塞遠  
暮江流恨入雲長  
古今天地誰非客  
何用登臨倍感傷

歸田次韻林南澗都憲

舊卜江南十里山  
此中塵事了無關  
新詩滿眼堪撩興  
畏路何日不道艱  
平素寸心緣國赤  
從今兩鬢為詩斑  
白湖也有垂綸地  
何日相煩過碧灣

五鼓發口上聞野哭

俯仰堪嗟一委形，征驂又動五更鈴。  
栢山月落烏啼歇，松嶺雲橫鶴夢醒。  
何處人聲看不見，誰家婦哭去還停。  
潮河近日渾流血，此日還聞水氣腥。

次韻程蘭峰至日對菊

乾坤此日復初陽，猶見黃花對雪霜。  
晚節偏於長至好，寒英獨傍短籬芳。  
分來西苑香尤迴，移向華筵興更長。  
歲晏相逢歡欲舞，滿頭插罷動詩狂。

贈黎雲上人

誰云惠遠德過人今見梨雲更絕塵  
花鳥有時偏得句  
茶瓜無日不留賓  
獨探佛印前三語  
無負黃金丈六身  
欲傍招提聞法要  
紅塵隔斷若參辰

西湖山莊雜詠

路入西湖分外幽  
遠山近水接平疇  
無端舍北蕭蕭樹  
不盡橋西淡淡秋  
高閣吹笙來獨鶴  
晚坡橫笛喚歸牛  
采蓮一曲空山月  
風露分涼上玉樓

次林都憲秋日閒居韻

閒來無事不開門看竹尋詩過小園秋水賦成潮未落  
寒山鐘動日初昏瓊宮芳桂遮青女金井飄梧挺碧孫  
屈指眼前誰是伴白湖亭上菊花樽

次西臺三公遊鼓山韻

日照平林花雨乾春風勾引上層巒靈源雲隔深探入  
古碣苔封細別看山閣凭來甌粵近石門開處海天寬  
浮生此日非常有好寫新詩記合歡

樵陽道中即事



使旌遙度白雲隈  
眼底新詩馬上裁  
霧重林深疑見雨  
灘高流急誤聞雷  
溪邊水鳥雙雙語  
路畔山花朵朵開  
底事鵲聲頻報喜  
城中應有故人來

黃州寄曹太守

地連雲夢面江湄  
爭說齊安景最奇  
赤壁磯寒潮落後  
黃岡山暗客過時  
竹樓舊見王公記  
魚笋空吟蘇子詩  
寄與同袍曹刺史  
登臨毋負再來期

劉阮再住天台不見仙子

自返塵蹤憶玉真仙源重到隔紅塵桃花流水迷前路  
白石清泉失舊鄰幾片閒雲封古洞數聲啼鳥怨殘春  
怪來妃子情殊昔羞見人間薄行人

寄題叫崑寺次韻歐陽祿進士

詩成僧未歸興盡吾欲去孤烟生遠村新月挂高樹

擬閨懷次韻

不寄平安書鱗鴻定無便夫婿別時容長在夢中見  
落葉階下滿鴛鴦冷羅幃青霜催白鴈鴈歸人未歸

一夜九迴腸起來倦梳沐不分雙燕飛銜泥污我屋

武夷四曲用考亭韻

金雞唱罷月生寒四面題詩石上看洞裏仙人今在否  
白雲常伴夕陽殘

書所見

蕎麥花開蛺蝶飛香秔穗重雉雞肥樵童雲裏挑薪去  
牧子風前弄笛歸

過江州琵琶亭

香山居士販商妻人物何勞細品題一曲青衫雙淚濕  
乾坤飄泊共東西

夢入桃源洞

昨宵飛夢入桃源洞裏桃花似故園昔日避秦人不見  
月明雞犬鬧孤村

題畫菊

春榮夏茂季秋香晚節還能傲雪霜不見東風桃李面  
幾竿修竹伴孤芳

綠野春耕

郊原生意動津津  
百室秋成在早春  
時雨一番啼布穀  
隴頭多少戴星人

晚歸口占

鳥宿僧歸日又曛  
馬頭衝破萬重雲  
前途不遠人家在  
風便雞聲隔岸聞


晚眺口占

無數歸鴉返舊林  
斜陽流水意沈沈  
一聲牧笛人何處

滿眼寒山晚翠深

題漁家樂

長空澹澹一江秋  
釣罷歸來已繫舟  
獨坐蓬窓何所事  
眼看飛鴈過滄洲



石倉歷代詩選卷四百六十六

欽定四庫全書

集部

石倉歷代詩選卷四百六十七

詳校官右中允<sub>臣</sub>薩敏

侍讀<sub>臣</sub>孫球覆勘

總校官進士<sub>臣</sub>朱鈐

校對官中書<sub>臣</sub>李奎

謄錄監生<sub>臣</sub>唐燦



欽定四庫全書

石倉歷代詩選卷四百六十七

明 曹學佺 編

明詩次集一百一

蕲貴

讀史有感

聖王御神器發政先施仁井田給饗飧雞犬供晨昏父  
母視赤子寧忍一夫貧囹圄竟空虛良用教化淳後人

戴黃屋理道遂因循刀筆吏作相法律勞心神民始自  
生息貧富誰能均糶獨尤可憐糠粃度秋春一飽且不  
遂七尺安能珍豈不愧為盜飢寒誠逼身縣官弗矜恤  
法網仍逡巡彼民何獨辜展轉秦復秦撫卷歌康衢永  
懷陶唐民

和張司馬仲湜韻送工部梁主事叔永還南京  
叔永厚齋閣老之弟子辛未門生

嶺南人物孰與京虞廷鳳翥非鴻征未論甲第多豪俊

且說君家好弟兄君家年少今阿衡三年不見荆花明  
池塘得句仍同被江海聞歌正濯纓政成書最誰為首  
我亦嘗叨稱賀酒德星午夜聚台垣太史占天曾見否  
風光莫戀雨花臺玉京未必多塵埃試看少傅登庸日  
也自南都奉詔來

築城謠為何石首決作富城即石首也

朝築城民爭馳暮築城民忘疲朝朝暮暮聽指麾役民  
之力民不知倏爾百雉臨江湄盜不敢問矧敢窺何令

尹來何遲昔無食今有魚昔敝袴今錦裾富城名不  
虛岌岌鐵不如千秋萬歲奠我居

送歸德太守張信卿詩

黃河之水天上來孤城歸德當其災耄倪往往化魚鼈  
官府處處生蒿萊水頭低者已十丈俯視城中翻作杯  
產鼃沈竈乃常事此民此地真危哉城邊父老泣相語  
黃河之水有時去爭如官吏險於河暴斂強征誰敢拒  
鬻男質女尚催科平地黃河可奈何黃河不治民不死

若治黃河死更多傳語州民莫怨煎新來太守才且賢  
豺狼斂跡河伯遜行見擊壤歌堯年

宿河西務

兩宿河西務離心日幾回望凝天闕近門訝使車來寒  
氣著人薄晴光向客開明朝須早發足馬上金臺

贈王君秉哲出宰耒陽時子大化解元方游南

監

雙鳬忽飛去天際羨王喬客坐青瑣舊賢闕玉樹遙湘

流環古縣山色入層霄佇見鳴琴日絃歌樂事饒

壽王翁守愚

故族推嚴父名鄉得大賓桑麻三世業花鳥一江春  
老健何煩杖安居不問津神仙元有種子晉是何人

夜與孫九峰吏侍論丘深庵太學故事慨然興  
仰乃用壁間黎太僕先生韻贈孫

空庭坐秋夜茅塞賴君開酷暑何方去秋風此又來  
口碑真勝石心醉不緣杯雪掩深庵冷誰當為育才

席上飲沂姪酒

瑞雪從天降歡聲動地來朔風猶臘鼓和氣已春臺玉  
樹層層起瓊花細細開甕頭三白色與爾且銜杯

送蘭孝先還廣陵

正好論心又欲行江風不盡別離情十年交誼推平仲  
一郡才華重長卿樹遶帆檣隔瓜渚天低睥睨見蕪城  
相思有意君知否九曲亭前看月明

同顧德光陶公輔飲唐良伯一泓清可軒夜歸

作

清可亭中待月遲  
風光疑是影蛾池  
一尊興與陶元亮  
三絕人憐顧凱之  
華燭搖心分暝色  
薰風吹爽入吟髭  
歸來不盡追陪意  
夢裏猶賡席上詩

舟至河西務喜而有作

蘭舟綵纜百夫牽  
帶月衝風路幾千  
自計迂疎成底事  
敢圖溫飽愧前賢  
千峰似逐孤帆轉  
一水能隨曲岬旋  
誰道禁城猶百里  
寸心先倚五雲邊



小傳見托冗未果作詩以謝之

文通朱謝苦君煩祇為疎慵獨負言管仲舊勞知鮑叔  
朱清自合傳宗元藥爐夜靜窺丹母竹院春暄數鶴孫  
還憶江頭為別處淡烟斜日水雲村

壽楊碧川先生叔母

萊妻陶母任稱賢曾似夫人樂事全地隔蓬瀛才一水  
眼看簪笏已三傳兒童也解歌麟趾天地從教醉鶴年  
好釀碧川供壽酒南薰歲歲醉華筵

送盛秋亭兼柬吳克溫

趨庭有夢天應覺故遣東風送畫船  
冗我尚逋端友詠祝君頻寄惠山泉  
松窓滴露臨蘇帖月榭分光校楚編  
間過義興吳季子相思煩為道懸懸

和王守溪先生獨居寫懷

退直鑾坡日已昏晴天月色照朱門  
離愁正自憑詩遣清樂終難與衆論  
望重調羹歸未遂情深陟岵夢猶存  
何當載酒春風坐暫借青氊半席溫

送吳君還宜興

才到京華便欲歸野人元不慕輕肥張公洞口鷗羣集  
揚子江頭鶴子飛白首最宜藤竹杖紅塵難薺薺蘿衣  
却思彈鋏歌魚者俛首依人果是非

送劉衡仲知濬縣

朔風寒日送君行翻覺春陽滿旆旌吏事太丘應有譜  
文章小宋亦知名天連北極郎星近地入中朝故俗更  
不獨秉驄膺召易頌聲先喜慰難兄

碧渠詩為李君宗朝賦

白雲深處有山莊分得滄溟入小塘水面雨翻菱葉亂  
門前風送稻花香竹牀不作勞生夢石枕惟藏種樹方  
愧我素飡無寸補明農何日共徜徉

用涯翁韻贈國儀

盟在雞壇未忍寒世情翻覆見交難椒花生菜他鄉會  
桑梓松蘿舊日歡青眼相逢惟子在素絲無數許誰看  
遙知五馬行春地花滿江城月正團

沙道中病足劉美之約同年攜酒問之以喉痛  
不赴戲柬

下堂君已無憂色辟穀吾非學異方難覓醉鄉嘲跛履  
且憑毛穎話中腸合簪此日真無分高興他時尚可償  
漫有尊前好風景已將詩力讓劉郎

送仲與立

暫違仍擬叙陳雷忽見新除事可猜驛路蕭條憐遠謫  
離筵落寞愧遲來易明任是遭無妄政美應教誦有臺

不久定知還賈誼別情雲樹自難裁

使節還鄉為丁應韶主事作

手持綸綍過庭闡忠孝如君兩不違負弩漫勞誇漢節  
稱觴先喜著萊衣胎禽引子排雲下老鳳教雛向日飛  
莫道簡書催又別北山猶勝未能歸

用前韻雨中紀事

天公應是起潛蚪故遣風雷振六幽匝地雨聲喧水國  
漲天雲氣失江樓坐妨耘務憂田父偏禱神祠走郡侯

頓掃頑雲回日馭令人却憶段公游

寓仁濟莊贈何竹逸

竹林鶴髮翁迓我南山下把酒對澄江相與說禾稼

寄錢君宗允

我在紅塵君碧山漫無音信報平安知君不是忘情者  
却為情多下筆難

寄水西唐居士

十畝青山萬頃田春來時放米家船鳳毛更在雲霄上

何用蓬壺別問仙

題淵明對菊圖

栗里風光別後詩  
清樽獨詠晚香時  
折腰欲問歸來意  
只許東籬老菊知

朱諫

字君佐  
永嘉人

趙澗邊葉丹厓在鴈山未回詩以寄之

老懷絕馳驅閒居少來往  
枕石松下眠步屨林間響  
携農看芳田喜見稻苗長  
種秫既有秋此外復何想  
意逐



浮雲去隨君到空山興劇足力疲不能強躋扳去為十  
日期期盡君當還幽齋倚修竹遲爾論金丹

趙雲溪白扇

我作滄海遊曾到鮫人室鮫人織素綃惠我盈一尺製  
為合歡扇清風生兩腋不見馬上塵意與林泉適北窓  
伴高眠微涼動衾席何物最相宜獨有謝公屐兼之上  
翠微可以周八極

短簫鏡歌

天子用虎臣敵愾建奇績委身守四夷四夷皆辟易歸  
來賜彤弓醉酒兼飽德綺筵羅金殿簫鼓沸雲日同心  
發和氣歡聲自盈溢咸願竭股肱干城効微力

寄趙雲溪

今日若耶溪不見採蓮女但見蕩舟人獨坐孤篷底放  
歌趁長風餘音逐流水一曲歌未終白日落西海紅顏  
不再妍青春豈長在蓮花空自開溪聲終不改

漢世有道士將貝多子種于嵩山一歲三花色

白而香蓋仙種也

外域貝多子一年三度花花開如白雪皎皎當仙家鶴  
背致嘉種麻姑分露華托根嵩山下匝地生金沙我欲  
居少室操瓢飲沝霞三十六峰前來往隨雲車醉卧三  
花下與世隔喧譁

秋水瀾瀾圖

古石斑斑簇紋蘚樹葉蒼蒼著秋淺瀾瀾沈浮水氣涼  
桂花散落天香遠年華易謝秋易殘傷心不獨周朱顏

宋玉如今已塵土空有辭賦留人間秋鳥向人鳴秋花  
促人老商聲下林端金風剪芳草杜陵詩興知若何愁  
緒如絲亂懷抱

贈黃萬峰

大山若遊龍蜿蜒直落蒼海中小山若奔馬遲迴蹴踏  
青雲下會稽分支到天姥鴈宕盤根接玄圃丹丘仙人  
居紫崑玉液金砂映窓戶淡淡松竹陰日與紅塵遠悠  
悠杖屨間安知有軒冕柴門不聽車馬聲春風滿地黃

鶯鳴門前芳草倚天碧  
酒壺自對南山傾

桑下雉雞圖

華蟲刷羽驕春陽  
雄飛呼雌下山梁  
灌木叢花動顏色  
錦雲爛漫呈天章  
朝飛不見牧犢子  
援琴誰復諧宮商  
何似中年得春暖  
馴行啄食依柔桑  
高墉一射呈餘巧  
繁弱漫誇弓力強  
雉子斑傳畫工筆  
番思往事皆塵迹

遊鴈山與橋姪

天柱峰前多古木  
芙蓉庵下仙人宿  
春風吹落碧桃花

子規啼裂山頭竹十年來往龍湫上一兩芒屨一枝杖  
飛流千尺落深潭白雪紛紛洒青嶂白髮看山愁日短  
好景招人及春暖我家小阮帶青錢提壺又向花間轉  
老夫樂事在天倫人間此樂方為真

乘槎圖

仙人御風行萬里九土茫茫盡煙霧張騫有術却乘槎  
飄然直上天河去順流更欲下崑崙霞衣又拂三株樹  
莫將勝事論有無直對芳樽詠佳句

江村即事

江頭拳石穩且平水光不動江無聲  
沙頭細草樹陰密白鷗自傍沙邊行  
野色萋萋及春暮浮雲片片隨風生  
老態疎慵厭塵事釣竿且復尋滄溟

憶鴈山梅雨潭

老樹龍蔥染春碧烟霧濛濛羃羃高  
石山人愛看梅雨潭葛袖芒鞋喜沾濕  
懸河一道從天來搗崖砢石如奔雷  
風迴電轉忽飄散細如洒雪輕如埃  
波光日影遠相盪

彷彿烟花吹復迴銜杯仰面坐莓苔貪看未盡日已頽  
深流自在白髮翁念之不覺令人哀

明月海棠圖

太液池邊月欲墜海棠花下楊妃醉月照金閨春夜長  
花近玉闌嬌欲睡東風淡蕩沈香亭花間恐有流鶯鳴  
玉笛聲隨落花去月明不見牽牛星玉人已去春無主  
御溝春暖空流水舊時明月空自圓花若含羞向誰語

漁村晚照圖



落日遙遙江水綠一葉扁舟當華屋漁翁生計等浮漚  
醉來每向滄洲宿野店炊烟冪高樹罷釣收綸且歸去  
蒼鷗泛泛似留人逝水無情向何處世人皆巧我獨拙  
鼓枻清歌日光沒磻溪舊事總不知手把深杯對明月

聽呂秉建彈三絃

三絃本是邊城樂誰與流傳到南越清歌妙手坐繩牀  
午夜高樓對明月初聞環珮鳴仙子空中行綵雲吹未  
散羅襪香塵生忽如猛將馳甲兵萬騎鐵馬相縱橫蹇

旗直出玉闌道  
瞋目咤叱龍沙亭  
悲來轉作戍婦愁  
闕山月照塞草  
秋鴈度瀟湘  
惜孤影猿啼三峽  
澄江流畫然一聲震  
高木子規啼裂山頭竹  
銀河倒翻柝木津  
天孫似向樓邊哭  
山中秋氣如水涼  
非此何由慰幽獨  
君能洗我冰炭腸  
邀君且就樓中宿  
絃停月落簾半垂  
童子燒茶茶正熟

題章千峰畫竹

千峰道人畫墨竹  
瀟湘虛映君山綠  
孤舟半夜錦瑟鳴

綠雲欲斷湘妃哭竹枝裊裊青接天湘南湘北皆春煙  
昔年我作上游客吹簫月下開樓船歸來不覺成白首  
舊日竹枝還在否蘭香兩岫鷓鴣啼亦有遊人來載酒  
千峰叟不獨會題詩亦擅丹青手鴈宕山頭千萬竿請  
君寫意憑高阜貌我同為歲寒友

芭蕉美人圖

何處飛來減春色一葉芭蕉轉深碧薰風窻下似酒濃  
玉顏一醉嬌無力芭蕉正好窻下看翠眉掩映憑欄干

莫遣西風剪梧葉滿庭白露生清寒君不見玉環舊日  
看牡丹玻璃進酒君王歡馬嵬山前墮青草香囊不返  
蓬萊魂至今野燒連高原圖畫芭蕉何足言

村居

萬山不斷雲氣橫芳洲若浮江水清昨夜涼風起天末  
一方落葉皆秋聲落葉飄飄風不定巖下名花開已淨  
高亭美酒須少年白髮朝來滿明鏡千金不惜買歌舞  
貴賤同歸一坏土江南風月閒處多結伴遨遊莫相負

寄京口丁點白憲副舊守溫州

點白先生歸去來海邦山色空崔嵬舊時桃李滿城郭  
紛紛還向春風開先生門栽五株柳頭戴葛巾手持酒  
仰觀宇宙薄浮雲富貴於吾復何有楊子長江遶書屋  
一點金山隔脩竹鱸魚作膾白似銀萬笋堆盤爛于玉  
先生此樂當何如屈指萬古惟陶朱我有扁舟欲相訪  
白蘋秋水連三吳

甌泉別墅

羅浮山下春泥滑白鹿城邊江水濶鳬鷺瀟瀟亂晴波  
極浦潮聲來聒聒幽人把釣竿編竹為長筏鯉魚尺半  
強浪逐桃花發鼓枻歌滄浪江空挂明月月色亂楊花  
悠悠作飛雪

東崑為盤城張君賦

崑岡原在盤城東璫璣吐絲如長虹卞和已化泉下土  
紛紛肉眼空相逢岡頭有地堪種竹岡下有地堪種粟  
隱君自足了平生海門月出來書屋

憶靈巖

曾到靈巖寺斜陽帶晚鴉  
山童掃僧舍茗椀對殘花  
拄杖看危石移尊就淺沙  
題詩轉相憶惆悵老年華

清明日泊揚子江

楊柳夾江青東風潮正平  
雲間旋蜃市沙際聽鼉更  
萬水俱東逝孤舟更北征  
不知時序改今日是清明

入清河

柳葉初凝綠桃花正滿林  
河流移故道海色變層陰  
午

夜一帆月征人萬里心風沙吹欲老短髮不勝簪

過筠石山居

何地是蓬萊雲煙萬里開山花數綠草竹影掃蒼苔鷗  
鳥隨風去蘭橈逐浪迴隔江新酒熟誰與一銜杯

武夷回宿護國寺

九曲循溪下長橋卧彩虹客懷憐蟋蟀秋意在梧桐古  
寺鐘初定虛窓日正中翻然動歸思新水送孤篷

期章千峰諸社長同遊鴈山



風雨滿西樓松間細水流獨懸孺子榻誰泛剡溪舟佳  
境能留客深杯可散愁待君攜杖屨同去看龍湫

寓江心寺

孤嶼清秋夜星河萬里槎江山如有約雲水暫為家白  
髮隨鷗鳥輕舟採石華秋風動歸思淅瀝響蒹葭

登白巖龍潭夜歸

春盡花無信山深客到稀夕陽還命酒細葛又裁衣樹  
影浮蒼靄燈花下翠微百年塵外意一醉即忘歸

金陵席上諸僚友押韻促筆催粧

睡起楊妃太液東  
海棠初試晚粧紅  
過雲愛聽歌喉響  
待月休教花影重  
金屋阿嬌猶對鏡  
玉樓翡翠未開籠  
琵琶半掩勞呼喚  
司馬青衫濕處同

陪萬五溪學憲至鴈山

鴈山山下惠風和  
野老追隨使節過  
海氣盡消波色定  
棟花纔落鳥聲多  
林烟漠漠春將別  
世路紛紛髮易皤  
借取僧房同一宿  
夜涼明月下庭柯

題珍溪朱南鳳書院

鴈蕩諸峰盡向西芙蓉水落到珍溪  
瓊枝玉樹連書屋白石清泉帶柳堤  
雨過杏川看犢飲春深草閣聽鶯啼  
眼前即是神仙地何必桃源更問蹊

雙溪隱居三首

竹屋藏書是隱君雙溪水落碧沄沄  
交流轉映窓前柳秀色平分海上雲  
碧月影連芳草渡菱歌聲動白鷗羣  
蘭舟曉起隨漁父濯足歸來日又曛

蘆花飛處鴈初來萬里長空霽色開  
淅淅涼風起高木  
灩灩白露下蒼苔青天半覆龍宮上  
斜日驚看鳥道回  
鴈蕩南頭縵嶺北此中佳境即蓬萊

落日西林樹影斜一川新水上平沙  
眼中萬事真如寄  
湖上孤舟可當家銀漢不流天似洗  
水禽無語浪生花  
張騫原是忙中客西域歸來又泛槎

西臯別盤石朱堯清

西岑落葉正紛紛江上風高起白雲  
錦席淹留當歲暮

畫船搖曳又黃昏  
歌聲欲動城邊浪  
雁影遙分塞上羣  
共踏紫陽山下路  
自知年力不如君

送朱先生北上

謝公亭下大江流  
子晉簫臺落葉秋  
九月菊花開滿路  
一天明月照孤舟  
小姬度曲還傾酒  
佳客看山獨倚樓  
榷梓定為廊廟器  
老夫自合住丹丘

冬日奚蘭室老友見訪喜而有作

江村寒月客來稀  
坐對梅花半掩扉  
燈火最憐清夜話

溪山偏愛故人歸  
酒尊欲盡還堪瀉  
世路無情已息機  
相見不須悲白髮  
山林鐘鼎總成非

章孝夫鴈麓山莊

陰陰竹樹遶山根  
石徑雲深蕩北村  
無數落花浮水面  
盡隨鷗鳥到柴門  
鈎簾靜對千峰月  
種藥新開五畝園  
長日南窓事高卧  
漫將風景說桃源

雲石圖為黃煉師賦

蓬萊山上白雲宮  
彷彿仙家遇赤松  
歲改不妨瑤草綠

春來又見小桃紅  
丹砂曾問容成子  
玉液真傳白兔翁  
欲把青囊與君說  
年來萬慮已成空

屏西

錦屏秀色如霞綺  
誰結幽亭近夕陽  
山勢北來連紫極  
海波東起浴扶桑  
青蓮開處秋雲冷  
白石歌殘午夜長  
已向南窓事高卧  
漫將泉石傲羲皇

松軒

長松千尺倚華軒  
軒外松陰五畝園  
睡鴨未醒雲滿地

主人相對酒盈尊  
香浮碧落紅塵遠  
影射虛窓白晝昏  
欲向徂徠訪仙跡  
試將丹訣就君論

寄楓林徐月湖

芳時不戀人浮雲  
空在目獨自把深  
杯醉向花間宿

僧拜石

高躡禮斗壇俯身  
向南極顧影落東  
暝來蹤自西域

贈趙雲溪

孤館秋高月色寒  
相逢同作客中歡  
後期只在東山下



一架薔薇帶月看

寄孫南江僉憲

再到山中訪紫霞  
紺園衰草夕陽斜  
舊時僧鶴歸何處  
獨立溪橋數落花

春夜獨坐

花送春香入酒甌  
山頭明月下簾鉤  
綠雲一片隨風散  
誰伴歌聲出小樓

瑤川新漲同魏海南泛舟

草暖風和二月天江南蝦菜不論錢前溪昨夜添新漲  
一葉中流范蠡船

夜坐

金爐火盡不聞香銀燭無光春夜長想見落花千萬朵  
盡隨風雨下池塘

玉女峰次湛塘韻

淡粧初出蕊珠宮翠壁丹崖想像中好似麻姑駕蓬海  
海波清淺日輪紅

同白總戎泛海觀漁

避塵無路却尋仙  
老去生涯落海邊  
春水接天晴日暖  
白鷗多趁釣魚船

湖南草堂為陳君賦

曉日初臨紫翠重  
奇峰萬朶削芙蓉  
浮雲半在藤蘿上  
玄晏先生一畝宮

石倉歷代詩選卷四百六十七

欽定四庫全書

石倉歷代詩選卷四百六十八

明 曹學佺 編

明詩次集一百二

杭濟

雪江為友人賦

北風吹雲凝不動大雪墮空寒色重長江拖底橫玉虹  
疊屑浮花欲成凍潮頭水枯沙渚明一片瓊瑤萬里平

古來天塹竟失險此時風景當誰爭  
高人獨凭此江上圖畫坐中開  
見漾眼花虛搖毛髮竦清入詩脾  
破塵障不如乘興山陰舟不須放  
鶴西湖頭孤懷曠世真迥絕直與  
冥冥造化遊

入關

關中山水古所稱纔入大關良足徵  
前山將迎後山送左江右嶺來相仍  
或如青蓮座中起或如危屏半空倚  
或如突出孤髻尖或如周匝高城壘  
龍飛虎伏還鳳騫

紆迴盤蹙斷且聯中窪為溪下為谷豁砑兩壁皆倒懸  
旁窺無底到千尺奔流撼地轟霹靂長松密竹交亂藤  
一磴盤雲出深黑此時日高煙瘴清僕夫步穩肩輿輕  
徘徊瞻顧不暇給陡使目眩心神驚不知造物何為者  
百怪千奇漫陶冶古今畫史縱絕妙假畫丹青孰模寫  
吾狂素欲效子長周游歷覽徧八荒宦途十年困羈梏  
夢中邱壑心茫茫薄才天遣寓此地山水有緣疑夙契  
短歌聊爾答山靈他時擬作南行記

贈蔣羽士

霓衣出山披紫煙飄飄丰度人中仙笑揮長劍走陰魁  
坐呼白鶴來青天問渠行藏定何所丹霞玄圃空同巔  
秋風吹來過我室對我熏茗談玄玄欲留信宿不可住  
飛雲萬里心茫然

題山水畫障

斷岸橫舟山日陰人家散居楓樹林江煙萬里破孤暝  
江波倒影天沈沈短渚長沙渺無極木葉吟風動蕭瑟



驚鳥歷亂飛盡空坐見遙岑送秋碧

次韻為羽士題畫

憑誰貌入丹青裏疑是仙人赤松子  
翛然長身立松下  
蒼雪墮衣風不起萬古乾坤歸一息  
手中琅函不盈尺  
笑拂髯龍倚太虛看破紅塵眼雙碧

建寧縣公館夜坐

鶴鷗半夜鳴屋角狐狸四野方縱橫  
我懷耿耿不得寐  
孤燈起坐天未明淒淒霜月白滿地  
隔牆聞有啼號聲

提兵千里欲戰伐區區市井皆疲氓公然飽食入山去  
心中氣激何時平牀頭撫視有長劍開函星斗光晶瑩  
安得猛士與戮力為挽天河洗甲兵

夏日偶作

三伏盛炎暑遠村人到稀年衰病衆集性懶事多違林  
雨竹涼細池風荷氣微藤牀與竹几坐卧日相依

舟宿錫山途中

傍舟依斷岸溪暝日沉時水靜知風定雲昏較月遲春

稠寒上怯野枕夢多疑照影青燈獨幽懷欲向誰

偶成

殘日照茅宇西風吹白頭一官今懶道百計早知休  
病葉秋先老遲花晚更幽清平我田野行復見西周

春夜宿黃山莊樓上

暝色西林入高樓一榻平天虛心迹迥山寂夢魂清  
簾月交花影簷風靜竹聲幽懷不可耐起坐徹餘更

送人南還

暫從塵市亦何心回首溪雲憶舊林孤棹夢隨天外遠  
短衣秋向客中深儒迂老去渾成態鄉語歸來不改音  
黃葉黃花滿門徑草堂知在水中潯

次韻楊名父對雪

窮陰連暝覆重扉咫尺蓬山隔禁闌玉燕舞風吹絮落  
銀河剪水作花飛遠搖滉漾能欺眼亂撲輕盈欲點衣  
夢裏梅花衾枕惡江南此夜正思歸

新春次韻秦鳳山

春風雙鬢換年華兀坐一官仍舊衙書几浮灰披汗竹  
墨池香沫散冰花十年裘馬塵中路一枕江山夢裏家  
欲傍疎梅問春信出門殘雪思無涯

山行次韻呂仲仁

萬落千村寒食時滿天晴日散游絲輕蹄踏草憐初碎  
高帽衝風怯半欹歲祀屢隨公例出韶光暗與賞心期  
穠桃艷李相將發誰說陰山春到遲

新晴涼甚在關左池上作次韻

西山昨夜一雨飛高城涼色早侵衣聞鐘長樂朝初散  
候敕承明立未歸御氣天香通碧落林光池影動清暉  
龍顏咫尺何由覩縹緲雲中望紫微

中秋對月次韻

滿庭金粟散仙葩天上團團樹不斜寒溢練光如沁水  
暈生珠彩欲成霞百年秋色平分夜一片歸心萬里家  
剛待明朝看又缺爭教衰鬢不添華

至寧德喜與君聘一會

入山正苦逢人少忽報君來兩日先事在不期真足喜  
會於偶得亦何緣長更話對孤燈雨別館寒分半榻氈  
身到異鄉同是客此懷相藉轉依然

過武夷次羅一峰韻

斷合溪流去復迴此中靈秘是仙胎枯槎架壑船空在  
蛻穴埋雲骨未灰壁絕兩厓懸紫翠祠深九曲漫蒿萊  
欲尋碧水源頭路斜日夷猶一櫂來

登紫雲洞

行轉山椒更鬱紆路疑絕處問樵夫紫雲洞倚天關近  
石竺峰懸寺塔孤飛蓋凌虛驚鳥度輕輿到險倩人扶  
山川漫擬真靈在仙夢還誰定有無

登閩越王釣臺用前人韻

高臺跂倚想英雄今古茫茫感慨同吞吐潮聲當海口  
屈盤山勢控閩中千秋享祀神如在一日圖王事已空  
大釣人傳遺此地斷厓陰雨鎖龍宮

署事薇垣夜坐偶作



衰病誰堪百慮并。偶來一榻坐殘更。文章合是西廳事。  
簿領何煩別署名。高閣風傳疎漏下。虛庭露洗暗涼生。  
多情惟有霜臺月。還向薇垣照獨清。

九日餘干途中

楚澤南來愁正長。清詩坐裏廢重陽。茱萸滿地誰家酒。  
風雨孤舟客子鄉。汗漫功名憐泡影。蕭條容鬢感秋光。  
陶翁歸興東籬下。千古令人思渺茫。

萍鄉道中遇雨用王伯安韻

古渡沙崩出岸痕長途泥滑水流渾經秋客路連千里  
到處人家聚一村乞老餘骸懷未得看山病眼恨先昏  
楚雲湘樹啼猿處風雨淒涼合斷魂

新正六日過東禪寺因觀壁間舊題用韻志感  
東郭依然野寺春重來忽憶舊遊人開軒花竹看逾好  
拂石詩題認却真白鶴向人如意舞青山于我亦情親  
一尊醉倚東風裏空嘆浮生去住身

途中漫作

行藏元與道相關知止年來合退閒  
剩得一官惟白髮歸來三徑有青山  
已忘世事風塵外不愧吾心俯仰間  
昨夜子陵祠下過江風吹雨淨衰顏

東溪小隱

清溪東畔隱君家幽事人將擬浣沙  
垂柳蔭牆緣岾曲短莎分徑入門斜  
春風漫漫意隨吟杖秋水乘閒放釣槎  
了却百年終隱計更無飛夢到東華

生日用舊韻

七十稀年已屆期坐臨白日戀西馳乾坤容我閒方得  
歲月凌人老却知弧矢柴門春到後江山杯酒雪晴時  
極知衰朽渾無用舊學何心更累絲

秋日過吳門訪白樓太宰

杜門久已謝逢迎扶病聊為訪舊行  
遠別廿年惟夢想相攜一笑即心傾  
幾人高節歸同社老我虛名負此生  
今夜西堂坐風雨一燈深話有餘情

杭淮

字東卿弘治己未進士  
澤西之弟有雙溪集

送中舍徐德章奉使過家

朝出城東門送子還故鄉  
故鄉多白雲登高重心傷  
風生潞河渚那能共舟航  
纖纖蒲芽短青青柳條長  
柳條不繫行蒲短空在傍  
平安千里音憑君達高堂

西山呂公洞

驚見呂公洞水邊駐春鞍  
側身入地底偏側頗碍冠  
藻燈如星明墜石訝劍攢  
魚貫緣曲折忽俯千丈湍  
却步不敢前下有龍蛇蟠  
腥風起昏黑颯爽肌骨寒  
翻思張

公勝焉得生羽翰五年客京華茲辰亦奇觀

送劉美之太守赴銅仁

園柳何青青江草萋以碧送子適萬里執手情脈脈嗟  
彼雲中雁翱翔依沙磧不為稻粱謀何以有南北努力  
慎所之悠悠豈終隔

見李介菴卷因念其為人賦此詩

濯濯楊柳枝開花大江隄轉盼春風顛飄泊岸東西美  
人隔江水誰當共襟期臨流和漁歌褰裳掇江蘺思之

不可即仰視白日馳玄髮日以變夕惕恒自持願將青  
青柏遺君長相思

早發巢縣暮宿金城寺

煙靄市上青霜露草根白日出鷄尚鳴墟落豁南北涉  
野多寒風枯楊何蕭索山川莽迢遞歲晏道路迫王事  
苦未休慘淡逾郡國暮逢禪房幽且復舒枕席

送王陽明謫官龍場驛

白日野中微浮靄結朝陰送子遠行役躑躅傷我心豈

無良朋儔不如予同音寂莫投窮荒誰能念浮沈願為  
雙玉軫相隨麗瑤琴

送李獻吉致仕歸陝

美人別我去各在天一方相見不可期秦川浩湯湯昔  
別長不惡今別一何長采采芙蓉花照見君衣裳從之  
不可得攬轡徒徬徨

八月十六夜飲王陽明館

素月殊未缺皎皎銀漢光照見庭中席浮盃宛清揚對



此輒復醉高歌激清商時節忽已邁白露霑衣裳人生  
有離別此樂不可常月高更起舞庶終清夜長

寄別瀾滄兵備林廷元

南阻瀾滄水北逾貴陽城惜哉不相見徘徊佇心情長  
林株葩耀候氣百鳥鳴緘辭千里道胡能慰平生

二

明月出皎皎行人發滄海海水清且長月明流光彩朱  
絃不聞聲顏色日夜改江洲多芳蘭褰裳思共采

挽李獻吉用曹太守韻

憶昔與君別執手河之陽  
豈意死生隔千里愁雲長河  
流向東注高林歇春芳  
相思贈行篇觸目惟琳瑯

二

花開復花落白髮悲青春  
鳳去遺修竹琴張樓暗塵  
精魂如不死上為列星辰  
思君不可見淚落滄江津

送吳頤山提學河南

暮收桂水楫朝驅大河車  
一別何草草王命有簡書  
子

行秉文柄實繫風化初空江木葉下霜清菊花餘念子  
不及餞回首空躊躇

送錢士弘監稅杭州

江畔柳何青青花飛化作江心萍風吹波濤散無跡人  
生去住亦何憑君去還復來春滿黃金臺不須對此意  
愴惻高歌且覆燈前杯憶昔坡翁守杭地半在西湖了  
公事君今豈是坡翁流瀟灑風情亦山水詩成想像寄  
遐風雲樹渺渺江之東

飲安慶江亭

江邊幸逢賢太守冬日江亭置春酒亭前長松不計年  
蟠拏屈曲虬龍走同年更逢王子喬蕭颯仙飈度崑牖  
日暮天風吹更急江勢洶湧波濤吼艤艫崩奔歛西向  
陣馬臨江亦何有壯哉乾坤目力盡歲晏蒼茫苦客久  
何當風從西南至擊帆須臾過京口

憚民部寄惠鮮笋銀魚

西曹暮歸城鳥棲明星在門北風作歲晏天涯感我情

相對妻孥苦不樂  
小女手持銀魚至  
兼有笋芽如犢角  
云是仙曹遠寄將  
此意年來重寥落  
三寸冰僵白雪蛆  
數莖春苞紫泥籜  
南山風高滄海深  
冬月何由見珍錯  
呼兒剥笋仍烹魚  
入口香醪似鮮酪  
更長燭明一放歌  
迴首家山事如昨

託吳僧乞石田畫

緬懷高人今白頭  
秋風未放滄江舸  
嘆息人間常見畫  
白水丹山無不可  
有時更出雙梧桐  
柯如碧玉參青空

下有閒翁曳杖屨蕭然意氣來清風自是君身有仙骨  
放筆塵寰看超忽且知畫者乃餘事君有聲名非汨沒  
吾亦平生頗好畫逢人不愛千金求安得生綃出東壁  
白雲為我生滄洲

送同年王載卿使廣東

憶昔荆溪花發時樓船泛泛日悠揚秉燭高歌大魚出  
風湧更深殊未央倏忽轉盼已成跡鞍馬共逐風塵客  
都城對面亦須臾兼有簿書相促迫秋風嫋嫋生江湖

復送君登萬里途蒼茫五嶺炎荒地無使瘴癘侵肌膚

劉元瑞贈劍作短歌奉酬

故人遺我以寶劍出冶芒寒上衝斗炯如秋水涵晶光  
揮霍臨軒鬼號走感君意氣吳季子慷慨及此同心友  
加以琕琕垂錦韉錯落應看百朋後珍重何須出尚方  
恐懼惟干佞臣首結束相隨萬里身磨礪肯使纖塵垢  
變化蛟龍脩有神恍惚風雷生我肘吁嗟壯志白髮生  
為君高歌一傾酒

觀張南園作畫因索溪澣春雲圖

憶昨見公丹青圖已覺妙絕今所無公為海內文章伯  
落筆自與他人殊隨龍雲氣忽飛動海天雨脚吹堂隅  
岑律回頭絕島孤野橋分明斷岸紆更貌一杖仙翁癯  
抱琴瀟灑雙童俱吁嗟青雲客曼異稷契姿早時拂衣  
卧南極無乃抱此胸中奇煙霞適與幽興會髣髴坐我  
清溪湄鱸鮓潑潑春漲動漁舟兩兩花枝歌清溪迢迢  
渺何所歲晚天涯滯遊子願公為我揮灑隨篋笥道路



風塵長如此

見羅羅

野人形骸如木土出入防身負長弩白布裹額金耳環  
腰下紅絲約雙股道傍私語如嗟咨山深少見漢官儀  
由來人情一失撫不獨此輩為豺虎

賈太傅宅

千年古宅空形影古井荒苔只自深寂寂星沙繫舟晚  
長秋五月寒蟬吟太傅才高稷契姿漢室少康安足期

惜哉少年苦太急一為痛哭君臣疑

鎮遠會劉同年念故鄉山水將卜隱居因題以

別

三河有靈山下有洵陽泉山高嵯峨鬱而秀泉性溫煥  
清且漣聞君念此將誅茅未去已覺心飄然雲霄赤驥  
整初駕風颭急隼當秋天胡為早作宴遊計無乃愛此  
山泉偏憶昔京都與君別回首十年不相見今朝執手  
蠻山中覺我哀遲顏髮變浮雲生態自朝暮碧草餘葩

滿郊甸人生出處何必同鐘鼎山林各有願別君何地  
更逢君把酒臨江心曲亂

送貴州周巡按子賢還朝

憶昨貴陽相見時朱榴花開光景遲  
言論侃侃見節操  
邊城五月清霜飛海內相逢恨不早  
憂時每見杜陵詩  
夜郎西來有逆順  
苗獍亦知事鋤犁  
草中狐兔不足數  
道上豺狼猶自肥  
去年天王狩東都  
不知何日還宮闕  
南國地遠無消息  
滄海日暮空愁思  
只今濟時須公等

袖中短疏安所為喜今簪筆朝天去坐見一日新朝儀  
從此鸞輿罷遊幸九重端拱問瘡痍

相思行寄中州和大齡

與君一別後兩見滁花開花落自春色思君高卧  
梁王臺梁王臺深三尺雪哀絃急管緣雲切至今風流  
空耳聞祇見臺高上新月明月照君心手彈綠綺琴夜  
靜聲激烈誰為聽君音罷琴對酒還復歌春風萬里吹  
黃河相思欲見知何地雪臺竹色今如何

送周中丞貞菴北行次韻

憶君五年不得見一見勿忙何即別  
金函將賀世室成  
玉佩趨朝寸心熱  
關山蒼茫歲云暮  
癯形千里當冰雪  
願君努力加餐飯  
馬上重裘慎朝發  
長安臘盡春色回  
喜氣風雲動城闕  
寵沐君恩拜舞餘  
緬想應回二三月  
瑯琊山深紫霞爛  
歐子亭高白石裂  
期君此時須少留  
置酒花間候車轍

送馬參將治守備燕河

將軍勇銳富才畧東方大盜不足平此日秋風灑金甲  
送君北上燕河營燕河逼臨古塞外犯邊輕我無備兵  
古人重守不重戰此行須爾為長城

題畫松

登堂忽訝生煙雲錯落長松偃東壁老幹半作虬龍形  
枝葉長留歲寒色古來畫者有韋偃近時廷章亦可師  
但留一幹在人世已覺澗壑無餘姿更添白石相撐倚  
日照蒼苔淨泥滓摩娑不覺毛髮寒五月高堂朔風起

張洞紀遊用萬弘德上舍韻

重遊名山三月暮  
雜花洞口春溟濛  
捫蘿累足入地底  
逸思飄然凌太空  
舉頭顛厓若覆盞  
瓊脂玉乳懸玲瓏  
危臺百尺俯幽奧  
疑與玄圃滄溟通  
中有石笋起撐突  
傍覺巨象馱蒙茸  
煙雲氤氲不出戶  
時有石燕飛空中  
蟠拏又如伏虎豹  
踴躍或似舞蛟龍  
千態萬狀接不暇  
吐舌駭此造化工  
眼無廬山瀑布泉  
暗滴石上時淙淙  
把炬搜竒更深入  
日午重關掩瞳矐  
手撫石牀蹴丹田

恍聞玉女歌仙童丹田芝荒石牀冷至今修鍊留遺踪  
世上三十六洞天不知誰者似張公吾生足跡半天下  
空聞海上有方蓬

沈石田與吳心遠遊罨畫溪燈下作畫題詩為  
別石田沒而文衡山添一舟貌二公於中今  
心遠亦沒矣見畫感興次韻

石田逍遙心遠逸攜手共作清溪遊風吹柳條映沙白  
水涵舟楫兼天浮畫中誰為石田老瀟灑綸巾歌白頭



心遠飄然若仙儔意氣已覺凌丹邱惜今二老不復作  
空使感歎臨長流頗有衡山補遺墨清溪明月至今留

寄沐參將崧

故人憶自滇南別忽忽已是十年餘雁飛亦是限南北  
不道十年無尺書將軍勇銳富韜畧有才偃屈空居諸  
吁嗟壯志豈終歇對酒猶自談穰苴公家老驥適棄野  
臂韞蒼鷹常待呼丈夫功業各有時幸今南夷宴無虞  
應知靜處學不廢好客還似當時無春來秋去花滿戶

尚想棋局臨方壺

春初有懷衛源阮副使同年

郊原日日春風生  
即看衛川花滿城  
看花泛水醉不已  
拄杖時聽黃鳥鳴  
吾鄉亦有罨畫溪  
溪大照見遊魚清  
未由濯足放歌去  
春去秋來空復情

復送顧華玉限韻限體

涼生六月薊門秋  
浩蕩河山景蒨舟  
渺渺雲兼江燕沒  
娟娟煙傍渚花浮  
高天灝氣開行色  
滄海文星徹舵樓

衣彩已凌淮水曲，鷄聲猶憶鳳池頭。  
嫫姚驥子膺長御，九萬鵬圖入壯遊。  
天署清高銓選府，地靈盤礴帝王州。  
陽秋行見照千古，勁筆須知回萬牛。  
裴楷清通元自異，商衡眉目更誰收。  
飄飄思遠風雲上，振蕩詞雄金石投。  
籍籍麒麟黃閣迥，早看功業耀前修。

襄陽習池

青山愛峴首，春風還習池。  
尚想山公醉，惟餘羊子碑。  
巖花落冉冉，江柳垂絲絲。  
亭臺斜日畔，今古一長咨。

看山亭成

百尺憑虛檻亭開坐見山清時無野戰司牧稱官閒雨  
意微茫外嵐光紫翠間樽前有雙鶴日暮與雲還

雨中登樓

節序黃梅候朝陰午不開浮雲暗山去急雨洒城來高  
艷紅葵濕低翔白鷺迴洗心亭咫尺煙靄擁層臺

至日陪祀山陵

龍翔鳳舞英靈窟萬壑千嵒紫翠分天上玉臺寒積雪

空中金閣迥浮雲百年青海無傳箭今日朝廷正右文  
一奠新陽昭格裏松蘿香氣入氤氲

除夕直宿部中同張元德刻韻賦

禁漏迢迢傳夜永椒盤相對燭花明省郎多病經秋骨  
客鬢雙蓬萬里情凍葉庭深餘雪色哀鴻天濶帶春聲  
鄉關臘盡無消息回首蒼茫北斗城

新修岳武穆祠

悵望秋風薦野蘋精忠祠宇又更新寒煙白日荒山暮

枯木南枝萬古春，志決幽燕終報漢。  
眼中頗牧已無秦，金符十二如兒戲。  
豈料安危繫若人。

經盤江次劉元瑞韻

踰岡陟嶺逢多病，臘盡春來不記程。  
瘴水已知添客淚，窮山只是有人行。  
緣厓晝霧愁俱黑，觸馬春花眼一明。  
西蜀未知天下險，老夫筋力盡南征。

興隆東坡書院和朱凌谿韻

欲于何處覓仙蹤，悵望危欄俯碧穹。  
石巖煙雲虛半壁，

春深花鳥滿幽宮  
乾坤一繫西來馬  
劍佩聊乘萬里風  
不必殊方問招隱  
蜀山元自小舟通

棟菴為黃朝用作

中山同事校文初  
廿載驅馳會面疎  
忝竊看花成白首  
棲遲種棟只安居  
風吟高葉琴樽曉  
雲接長溪戶牖虛  
何日扁舟挂冠去  
跳湖東畔訪幽墟

春初飲亭上簡同僚

悠然亭上坐春風  
落日清樽幸不空  
弱柳漸看低檻碧

天桃似欲向人紅  
地分省寺通僚晚  
春入江湖引興同  
總作淵明賦歸去  
南山亦已笑成翁

題贈施文學

舟紆北渚輕風浪  
春入高城幾往還  
喬木眼中無故宅  
行人溪上問南灣  
沙堤竹長縈新水  
書屋花開帶遠山  
回首豐城餘劍氣  
中宵應出斗牛間

蓼莪山奉次澤西兄韻

五湖春色際天來  
沙鳥風帆遞往迴  
笑日野花幽近竹



入雲風磴冷侵苔  
棲遲白首惟疎放  
報答青春信酒杯  
好事山僧能不倦  
晚猶攜客上高臺

送李獻吉餉軍寧夏

遠道青驄何蹴踏  
高柳玄蟬苦嘈啞  
送君先憶見君時  
薊門春日啼鶯合

二

觸人秋暑何瀾瀾  
遊子驅車涉千里  
悠悠旌拂華山雲  
蕭蕭馬度涇川水

三

西塞山前列亭障，劍氣凌雲意何壯。  
漢家諸將收匈奴，功名早致麒麟上。

送錢水部致仕還無錫

張公洞深白日裂，吳溪水燠青蘋香。  
夢中風土亦不惡，他日與君俱故鄉。


又

銀鱸重引江湖興，金掖初分鴛鴦羣。  
白水春帆瞻細雨，

青天絕塞送孤雲

醉翁亭待客

幽期有客久不至  
漸看山中白日斜  
不有崑阿數枝竹  
是誰相伴坐煙霞



石倉歷代詩選卷四百六十八